

KEJUARAAN SILAT SEDUNIA

Kelantan sediakan enam peserta lelaki, tiga wanita

18 OCT 1987
KELANTAN menyediakan enam pesilat lelaki dan tiga pesilat wanita bagi mengikuti pemilihan semula pesilat negara untuk Kejuaraan Silat Sedunia di Kuala Lumpur pada 2-9 Disember ini. *Ruak/Ruak*

Sungguhpun Pesekutuan Silat Kebangsaan Malaysia (Pesaka) belum lagi menetapkan tarikh pemilihan itu, mereka sudah pun bersedia untuk tujuan itu.

Guru Silat Teriak Empat Kelantan, Mohd Noor Mahmud, berkata pesilat-pesilat itu sudah menjalani latihan sejak tiga minggu lalu untuk tujuan itu.

Katanya, persiapan awal disusun selepas pihaknya mengetahui ura-ura Pesaka mengenai pemilihan semula pesilat untuk kejohanan itu.

Antara pesilat Kelantan itu, Abdullah Muhammad (pemenang pingat gangsa di Vienna), Shamsuddin Mohd Noor (kelas C), Kamarulzaman Yaacob (kelas D), Zulkifli Shafie (kelas E), Mat Sidek Mamat (kelas F) dan Azam Abbas (pemenang pingat

gangsa di Jakarta).
Pesilat wanita pula ialah Wan Amizah (kelas A), Tengku Azizah Tengku Ibrahim (kelas B) dan Wan Suziana Mohd Noor (kelas C). Bagaimanapun, kedudukan Wan Suziana belum dipastikan kerana dia perlu mendapat kebenaran keluarganya.

Mohd Noor berkata, sebelum ini ada ura-ura, Wan Suziana ingin bertanding semula tetapi belum rasmi lagi. Beliau terpaksa menarik diri daripada mewakili negara ke Sukan SEA lalu kerana masalah peribadi.

Katanya: "Saya percaya pesilat-pesilat wanita itu akan mendapat tempat dalam barisan kebangsaan nanti. Ini berdasarkan keadaan fizikal dan latihan yang bersungguhsungguh."

Menurutnya, ketika pemilihan Sukan SEA lalu, pesilat-pesilat wanita itu tidak sempat menjalani latihan dan gagal.

Mengenai kedudukan bekas pesilat kebangsaan, Abdullah Mohammad, guru silat itu memberitahu, pesilat berkenaan sudah cukup bersedia un-



tuk mewakili negara kali ini.

Mohd Noor menjelaskan, pesilat itu kini pulih daripada kecederaan akibat patah tangan dan dia lebih cergas untuk mengekalkan pingat gangsa yang diperolehi di Vienna, Austria tahun lalu.

■ PESERTA Silat Terbaik 1986, Ahmad Wardi Salim mendakwa Majlis Silat Negeri Melaka (MSNM) mengabaikan tanggungjawabnya kepada peserta-peserta silat di negeri itu.

Katanya, MSNM tidak menyediakan kelengkapan yang diperlukan oleh peserta silat di Melaka untuk latihan.

"Oleh kerana tidak mempunyai kelengkapan yang cukup, saya dan rakan-rakan yang lain berlatih secara ala kadar sahaja," jelasnya.

Ahmad Wardi adalah peserta negara dalam kelas B di Sukan

SEA, Jakarta baru-baru ini dan memenangi pingat gangsa.

Pesilat ini akan mewakili negara dalam kelas yang sama di Kejuaraan Silat Dunia di Kuala Lumpur Disember ini.

"Jika MSNM tidak dapat menyediakan kelengkapan itu, saya terpaksa menunggu latihan lebih sempurna di Kuala Lumpur nanti," tambahnya.

Ahmad Wardi berhasrat menumpaskan musuh tradisinya Joko Wedodo dari Indonesia di kejohanan itu.

Bagaimanapun, dia masih mengalami kecederaan di kaki kanan dan menjangka akan sembuh akhir bulan ini atau bulan depan.

"Joko adalah peserta silat yang digeruni oleh semua pencabarnya, tetapi saya yakin mampu mengalahkannya kali ini," kata beliau.